

摘藻堂四庫全書薈要

集部

欽定四庫全書薈要

集部

御選元詩卷二十八

詳校官原任主事
臣李斯咏

欽定四庫全書薈要卷一萬八千四百四十

集部

御選元詩卷二十八

七言古詩五

吳萊

五洩東源有地度可十數畝後負山前則石河

如帶幽負深窈蓋隱居學道者可築室偶賦

一詩屬陳彥正

越中五洩古名山東源峻嶺空雲間老石峻嶒欲見骨



天河瀉破莓苔灣蛟龍縮身似蜥蜴魑魅出沒司神姦
雷公一聲忽下擊鳥跡不到猶重關青華仙真舊治所
碧落侍從登清班穴疑綵狻據一柱戶想銅獸銜雙環
鳳馭鸞鞭白羽瓘芝樓茵閣朱莖殷梯梁未絕或可值
洞府寢遠多愁顏嚮曾褰衣得揭涉別擬鑿徑通茅管
寬弘頗占十數畝負靜粗覺非人寰澗流帶綰玉繚繞
巒翠髻擁花爛熳截斷塵埃與世隔構成棟宇寧吾慳
陳君尋常有道力況此跬步臨幽潺虛室光明白不動

寶鑪溫養丹將還丈夫出處我已定馳字早寄孤飛鷗
休拘崑崙并漲海遇有勝處同躋攀

風雨渡揚子江

大江西來自巴蜀直下萬里澆吳楚我從揚子指蒜山
舊讀水經今始睹平生壯志此最奇一葉輕舟傲煙雨
怒風鼓浪屹於城滄海輸潮開水府淒迷濫灝恍如見
潏澠扶桑杳何所須臾草樹皆動搖稍稍鼃鼃欲掀舞
黑雲鯨漲頗心掉明月貝宮終色侮吟倚金山有暮鐘

望窮采石無朝觴誰歟敲齒呪能神或有偃身言莫吐
向來天塹如有限日夜軍書費傳羽三楚畸民類魚鼈
兩淮大將猶熊虎錦帆十里徒映空鐵鎖千尋竟然炬
桑麻夾岸收戰塵蘆葦成林出漁戶寧知造物總兒戲
且攬長川入尊俎悲哉險阻惟白波往矣英雄幾黃土
獨思萬載疏鑿功吾欲持觴酹神禹

吳師道

十臺懷古

并序 錄六首

友人自杭來示及濟南王公十臺懷古詩讀之感
慨不已夫江山故宮歌舞遺跡千載之上英雄游
焉千載之下狐兔行焉俛仰廢興孰能無情而詩
人尤甚發為咏歌詞雖不同而意總合若物之鳴
以類而應余安得忘言哉余生好游嘗聞司馬子
長杜拾遺覽觀四方山川之勝以壯其文心竊慕
之異時浮江淮溯湘沅上巴峽過秦漢故都歷燕
趙齊魯之陽所見如十臺尚多訪遺老詢故實足

以發一時之興快宿昔之願歸而讀馬杜之詩文
以證其所得焉耳

朝陽臺

神娥縹緲高唐上
楚宮樓閣森相向
丹楓蒼桂湧孤闕
錦石清江簇連嶂
行雲漠漠飛雨寒
孤猿咽咽秋花閒
翠旂龍駕杳何處
斷魂殘夢愁空山
微臣宋玉誇能賦
當日襄王豈真遇
千古秋風恨未平
高泉飛落三巴怒

黃金臺

昭王銳志移青社築土懸金奉賢者四方劒佩集強燕
千里風塵馳駿馬郭君自舉先羣豪樂生獨步超凡曹
酬恩一雪伯國恥建功並倚雲天高君臣意氣千年少
落日荒墟沒秋草黃金買貴滿長安惆悵英雄布衣老

戲馬臺

項王戰馬從東來意氣蹴踏全秦摧入關不並沛公轡
還鄉却上彭城臺重瞳按劒風雲靡萬匹騰空煙霧起
淒涼垓下泣名騅零落江邊餘數騎寄奴千載心爭雄

登高把酒臨秋風
詐移晉鼎非男子
君看百戰東城死
歌風臺

沛公置酒君王歸
酒酣思慘風雲飛
兒童環臺和擊筑
父老滿坐同沾衣
一歌豐沛白日動
再歌淮楚長波湧
龍髯氣拂半空寒
虎士心馳四方勇
河山蕭瑟長陵荒
野中怒響猶飛揚
高臺未傾風未息
故鄉之恨那有極
銅雀臺

半空高棟翔金雀
玉宸總帷塵漠漠
西陵老樹暝色寒

建安殘妓春情薄曲終紅袖辭尊前簷傾斷甍飛人間
分香老淚恨不滅秋風吹入苔花斑漢家一片當時土
肯為姦雄載歌舞銷盡曹瞞萬古魂落日漳河咽寒雨

鳳凰臺

金陵王氣飛祥雲鳳凰臺上聲和鳴鳳來春風花冥冥
鳳去秋風荒草生嬌娥舞散高城暮青山迴隔丹丘路
斜陽門巷語烏衣細雨汀洲飛白鷺江空天闊鳳影遙
謫仙吟罷誰能招六朝宮闕煙蕭蕭月明半夜人吹簫

春雨晚潮圖

昔年曾看錢塘潮，龍山山下乘春濤。
中流回首洲渚變，孤塔不動青崖高。
雲昏水暗雨陣黑，雪噴電轉潮頭白。
浙江亭遠亂帆飛，西興渡暝千花濕。
空江茫茫魂欲斷，歸來十年驚復見。
浩蕩東風滿畫圖，淋漓海氣飛人面。
春深故國芳草生，鴟夷遺恨何時平。
重游弔古惜未得，掩卷歌罷空含情。

桐廬夜泊

合江亭前秋水清，歸人罷市無餘聲。
燈光隱見隔林薄，濕雲閃露青熒熒。
樓臺漸稀燈漸遠，何處吹簫猶未斷。
淒風涼葉下高桐，半夜仙人來絕巘。
江霏山氣生白煙，忽如飛雨灑我船。
倚篷獨立久未眠，靜看水月搖清圓。

舟行得風

江豚昂鼻噴噴驚，波秋來江風西北多。
掣帆鼓篷疾於電，銀屋怒擁高嵯峨。
江南江北青山色，著意相看忽如失。
我行小遲亦何害，人生取快寧多得。
賈人舟子勿嘯呼，

野有垂泣耕田夫三月不雨田水枯

五月一日即事

黑雲滂渤如積山白雨注地聲潺潺須臾雲散雨亦歇
斜陽映著高林間林間沈沈萬濃綠影弄微風自相觸
新蟬忽作去年鳴使我淒然感心曲

紅玉杯為陳雲嶠太祝賦

夷人揀玉河源水夜候霞光矗空起將歸萬里售中州
琢刻為杯世無比截肪栗色非不奇雞冠通赤希見之

筵間乍置爭注目誰復更顧黃金卮小槽新壓真珠滴
擎向桃花花下吸但餘落日爭光輝未許妖姬比顏色
主人今代陳孟公閉門留客酒不空千金之裘五花馬
不惜買醉酬春風公侯家世多珍物獨寶此杯為故笏
華堂舞罷飲闌時什襲珍藏莫刊缺

三月十八日張仲舉趙伯器吳伯尚王元肅同
游西山玉泉遂至書山

肅清門外春草青背城曼衍趨郊坰西山曉晴出蒼翠

高下不斷如連屏道傍巨冢烏鳥噪寒食野祭遺羶腥
溝深路狹雪泥在緩鞚瘦馬仍鈴駢行行山近寺始見
半空碧瓦浮晶熒先朝營構天下冠千門萬戶伴宮庭
寺前對峙兩飛閣金鋪射日開朱櫺截流累石作平地
脩梁雄跨相緯經平臺當前白玉座刻鏤精巧多殊形
當時御舟此游幸清簫妙管魚龍聽沿堤萬柳著新綠
未見蒲葦彌煙汀鳬飛鷺起渺空闊使我清思凌滄溟
游船兩兩棹歌起亦有公子攜娉婷主僧說法據高座

撞鐘擊鼓聲發霆欣然肅客道周歷顧瞻幻怪何神靈
後園小殿翳花木繡幃香閣猶深扃坐陪方丈談疊疊
伊蒲清供分餘馨出門暄風掠人面前趨復歷岷與涇
泉乾土勁草樹少祇有廣塔高亭亭香山蘭若金源舊
猶餘大定殘碑銘長松老檜見未有澗水繞屋鳴清泠
扳危涉險劇喘汗却下迅走誰能停班荆列坐杏花底
擽觴受此香雪零日規漸隱半峰側酒行不盡雙玉瓶
衆賓來醉有餘興惟吾却飲嗟獨醒疾驅信馬路已熟

遙見樓堞塵冥冥歸來門巷未深黑春雲黯黯明疎星
廣文官况淡於水矧復聚散如浮萍玉泉頗恨不少住
客意更擬同揚舲明朝清游墮夢境擁書却坐槐陰廳
歐陽玄

題山莊所藏東坡畫古木圖

看山昔日生三蘇一山草木為之枯後來筆端挾春腴
却令生意回枯株樹經公筆無老醜天以春工付公手
誰云輩行龍眠翁奚必法嗣洋州守山莊劉氏富清玩

家有蘇公舊揮翰恍驚濕蘚黏怪石慣見倒根生斷岸
涪翁對此煮春茶為公梢上挂長蛇燈窓細讀假山記
秀氣終屬眉山家

示姪

吾宗孫子多好學爭持卷軸求余詩嗟余膏馥有幾許
况復老懶惟其時子年弱冠氣方銳立志要與青雲期
冀馬生駒汗血器越女墮地瓊瑤姿固知美質故應爾
所貴論道隆師資牧之涉世晚自誤冬至作詩鐫阿宜

初陽萌動慎培養萬木一本含春滋

道吳山

道吳山頭目龍卧疊嶂重岡深紫邏靈湫瀑布千丈長
古寺神杉十圍大崇祠坎坎風雨來樵徑丁丁鴻鴈過
郡人夜望北斗魁下有突兀青蓮座

大圍山

大圍山高高幾許絕頂嵯峨戴林塢石隙花開自春夏
地鑪僧擁無寒暑清流白鵬滌毛距綠樹黃熊引筋膂

山腰日午嬰兒啼知有雷公出行雨

陳泰

將離京師別李朝端陳伯奎二同年

陳生射策未三十筆箭如鋒不破的自古英雄感慨多
直比臬盧懸一擲文章有命不論巧得喪窮通兩何惜
吾州二妙真豪放白壁明珠炯相望蜚英已邁時輩先
通籍還兼伯兄行霜蹄歷塊千里空風采承恩九天上
我辭君歸春正晚天風吹帆落花滿青冥浩蕩南極深

白日波濤洞庭遠感君惜別重徘徊令我長歌激肝膽
雲山之東佳氣濃礫裂華蓋晶熒通紛紛鸞鵠好羽翼
莫笑垂翅南飛鴻

題蒼龍戲海圖

天孫織雲春錦紅玉梭悞落乘剛風一夕變化雲冥濛
海水起立為珠宮坐令年年機杼空誰與黼黻上帝躬
求梭不得愁鬼工安知入君懷袖中

醉書王元德德聚亭

前日相逢一尊酒即欲寫向君家亭別來十日不會面
胸次硤兀愁難醒憶我曾為帝城客客裏論交話疇昔
玉樓絃管天下春醉舞楊花日西夕此時聚首情皆真
雲萍轉盼難重陳高官坐揖小官拜九州四海知何人
長安少年更羶薄一餉飛蚊聚歡樂殘盃冷炙心已悲
此士平生慣藜藿君不聞漢時豪傑稱東方列卿太史
尚書郎就中亦有貧賤者威動星宿回清光為君痛飲
亭邊月懷古傷今重離別丈夫有志江海深匣中雄劍

知君心

詠雙芙蕖

雙芙蕖連理發不恨狂風頃刻吹只恐游人輕易折君
莫折花有情不是同心眼前久還他同死復同生

謝端

送李彥方副使之閩

使君昔我豸冠日正色危言動明主臺除近日多留中
今日東門送君去平生不到黃河壩寨帷萬里閩關路

畫鷁輕搖楊柳風
繡衣肯裛薔薇露

宋裝

歐陽原功由藝文少監謁告歸瀏陽

七年不見茶蘼花
湘南學士思還家
賣馬徑出藝文監
買船便赴潞河沙
始隨徵書官壁水
北門風月清談爾
兵塵荏苒居庸闕
襆被蕭條教忠里
奎章閣上進成書
九重知是尹蕪湖
腰帶黃金佩蒼玉
玉卮賜酒榻前趨
君恩如海誰能報
回首鄉關動懷抱
尚平婚嫁幾時畢

陶令田園何日到槐舒兔目柳如絲浩然歸興南風前
閨人含啼僕夫喜那顧悲歡各異緣西山過雨離筵曉
川途萬里雲繚繞里閭逢迎樽俎歡都城會合簪纓少

太白酒樓

我昔在髫年知有謫仙人少壯讀所作天才氣凌雲潯
陽紫極宮往歲聞佳句采石青山頭前月拜荒墓夜宿
簷下雲秋弄江上月何如任城樓狂飲興豪發況有任
城宰具酒復知音酒酣隘八極世事徒駸駸內子香閨

夢伯禽嬌且啼人間火宅謾煎逼政是玉山傾倒時
散披紫綺裘倒著白接羅銀臺金馬直一唾方瀛絳闕
行將去仙之酒杯失遺基樓觀雄垣表暗題咏石榴海
柏森西東謫仙人今何在汶水鳧山黯蒼靄手揮玉鞭
騎玉鯨應在浮雲九州外仙人魂魄茫氛氤望之不見
矧可親明朝我亦玉京去願謁蓬山賀季真

王士熙

送和林蘇郎中

居庸關頭亂山積李陵臺西白沙磧畫省郎中貂帽側
飛雪皚皚馬韉濕馬蹄雪深遲遲行冷月棲雲塞垣明
鐵甲無光風不驚萬營角聲如水清明年四月新草青
征人賣劍隴頭耕思君遙遙隔高城南風城頭來鴈鳴

送華山隱歸西湖

方士求仙入滄海十二城樓定何在金銅移盤露滿天
琪樹離離人不采軒轅高拱聖明居群仙真人左右趨
青牛谷口迎紫氣白鶴洞中傳素書珊珊鳴佩星辰遠

寂寂珠庭雲霧虛脩髯如漆古仙子玉林芙蓉染秋水
九關高塞不可留歸去江湖種蘭芷山頭宮殿風玲瓏
元猿飛來千尺松閒房誦經鐘磬響石壁題詩苔蘚封
欲向君王乞祠祿安排杖履來相從

楊敬惠

題秋景圖

金門羽客茅山來袖攜千仞青崔嵬開緘滿堂秋色起
耳根彷彿清猿哀白雲溶溶漲川谷谷口蒼波瀉寒玉

輕舸一葉何處歸錦樹煙扉半紅綠汀沙空濶天渺瀰
山有楔揄水鱣螭篙師未必好看客行人踽踽將何之
察伋

題錢舜舉秋江待渡圖

大江微茫天未曉散綺餘霞出雲表亂山滴翠露華寒
隔樹人家茅屋小行人欲發待渡舟垂綸獨釣磯上頭
感時撫卷寄遺意蘆花楓葉蕭蕭秋

顧文琛

題錢舜舉畫漁翁牽罾圖

苔溪道人溪上居一生只慣觀打魚吳兒打魚當耕織
意匠別出絲綸餘緯葭縛竹直水口承以密罟防其遁
卒然一掣勢莫御紫鱗躍出金芙蓉蓬窗草戶色色具
茶瓶酒碗尋常俱船頭青山立突兀船後綠樹搖扶疎
人間名利不可污煙水為席天為廬西塞山前晚風急
醉踏船舷浪花入漁翁心事道人知日暮來看倚筇立
迴頭却捉秋兔毫寫入生綃半猶濕令人展卷心茫然

辛苦微官悔何及吳淞江上鱸魚肥秋風落葉滿漁磯
何不買舟逕東歸何不買舟逕東歸

建平道中遇雪

北風如弦雪如箭來射長途旅人面黑雲匝道天為愁
四望群峰白於練蕭條聚落才百家日暮青煙起山縣
荒林叢葦少人行斷鴈殘鴉有時見憶昨年少輕遠遊
曾跨驂騑走畿甸只今潦倒困微官馬上低徊發哀怨
丈夫事業未易論但怪流光速飛電便須大飲敵清寒

未用悲吟歎羈賤

趙櫛

贈郭上長歸括蒼兼簡葉縣尹林府判二公

夜聽春雨鳴雨晴君欲行君行向何處回覽括山青括
山萬疊青未了漠漠寒煙隔飛鳥三年官冷不得歸歸
夢時時度雲嶠竹雞鉤輶啼夢殘落花如雪春風寒客
途塵土何漫漫握手未許攀征鞍東關且盡雙樽歡東
關柳如帶中有別離態折贈不可持依依自相待宦游

江海事多違我輩論交金石在舉頭咫尺天涯別行李
蕭蕭浸明月出門大笑心激烈良儔往往多契闊每一
思之生白髮白髮生何足驚志士慷慨期晚成酒澆磊
傀澆不平況復不飲難為情長歌散作陽關聲子先歸
兮我暫停丈夫耿耿氣肯灑兒女淚浩蕩天地間清流
豈常聚郭公子休徘徊京城二月鶯花開東書早上黃
金臺黃金臺上多英才拾取青紫實快哉秋來我亦遠
遊計萬里殷勤空相遇到手功名俱得意却誦如今長

短句

許謙

題延月樓

崦嵫稅駕紅塵息
玉鏡飛空天地白
嬋娟先得何處多
齊雲翬翬高百尺
清光無私照寰海
舉頭千里明長在
主人欲擅四時秋
夜夜掀簾為延待
人生見月幾圓缺
今昔人殊同此月
人迷夢覺月晦明
終古相摩寧暫歇
倚闌清嘯酒莫遲
銅壺催曉輪易斂

遊龍回寺碧雲堂有何無適草書

蒼鱗作霖回壑裏竟化長岡飛不起何年老僧飛錫來
強架檐楹萬山底碧雲石梯如登天俯視竹樹行其巔
巖巒起伏呈怪狀壯若群馬奔吾前何仙仙去不復返
滿壁龍蛇驚醉眼可憐一半委塗泥况復跼危混苔蘚
山翁摸搦妙入神永和繭紙且逼真勸君勿辭一日力
為我留為百世珍君不見二王舊帖皆殘編至今不惜
千金傳

馮公嶺

層巒疊嶂危相倚，亂若飄風湧秋水。
寒松荒草間蒼黃，照眼崢嶸三十里。
初如井底觀天門，一峰巍然中獨尊。
縈回百折至絕頂，俯視衆嶺來兒孫。
人言此山插霄漢，馬不容鞭僕夫歎。
攀援何異蜀道難，氣竭神疲背流汗。
熟視徐行路，覺平心寬意適步更輕。
志須預定自遠到，世事豈得終無成。
我來正值窮冬月，倚杖巖前嚼松雪。
午店煙生野飯香，陽坡日近梅花發。
寄語悠悠行路人，

乾坤設險君勿嗔胸中芥蒂未盡去須信坦道多荆榛

陳樵

代玉山子答

建昌老父吹羌管背花吹盡風花片雪中花老花未知
我起開簾納江燕夏姬出境春爭妍房老不出金谷園
花奴鼓急人人顧呀光帽滑花難住

待月壇

憶昔待月錢唐秋眼寒桂樹枝相樛桂枝半蠹花不實

折之不得令人愁帝鄉幽燕邈吳越還向山中弄明月
聞道君家待月壇壇空風露何漫漫便欲因之遡寥廓
倒騎玉蟾飛廣寒廣寒宮殿殊清絕素娥嬋娟皎如雪
笑指桂樹對我言留取高枝待君折待君折須幾時明
年八月會相見付與天香第一枝

題海棠

東風吹墮綳雲影別院春遲宮漏永繡帷寶帶綰流蘇
夢入瑤臺呼不醒熒熒銀燭花蕊多城頭烏啼奈曉何

胡伯玉隱趣園君子池

五月菑菑發紅粧明綠波君看池上水何似若邪多若
邪女兒歌豔歌輕舟短櫂相經過傾城顏色有人妬日
暮涼風知奈何

丁復

送周士德還北

東風吹花繞白門南人送客開綠尊綠尊空盡客當發
白門惜別花無言周郎挾書南州讀濯髮春江水如綠

功名早年一唾手鄉里老人皆刮目巍巍廊廟急需材
明日辟書天上來鳳凰翩翩下千仞羽翼五采江南臺
南竹有實梧有樹歸飛即向岡頭去霜風一肅天地春
鬱作雲雷散霖雨老夫借屋鄰僧房門前蓬蒿十丈長
目力苦短耳力强喜聞斯世登虞唐

題劉堯輔觀瀑圖

劉侯校書天祿閣向人輒作山水畫長巒老樹翠蓋敲
轉瀑懸厓練花瀉黃冠白袍問子誰濠梁漆園避世者

京師塵起碧於雲
炎州瘴來疾如射
揮毫定憶龍河上
挾帆久睨匡廬下

蜀江春曉

蜀江二月桃花春
仙子江頭裁錦雲
牙檣艇子雙蕩槳
蘭葉衝破愁殺人
浣花詩客茅堂小
醉眼看春狎花鳥
柳絮拋風乳燕斜
畫簾捲雨啼鶯曉
靡蕪草生蘭葉齊
碧流黛石青無泥
郛筒有酒君莫惜
明日殘紅如雨飛

趙巖

題展子虔遊春圖

暖風吹浪生魚鱗畫圖彷彿西湖春
錦韉詩人兩相逐
碧山桃杏霞初勻粉堦朱檻眼欲醉
垂楊淺試脩蛾顰
人間別自有蓬島仙源之說原非真
危橋凌空路欲轉
飛流直下煙迷津畫船亦有詩興好
娟娟未必飛梁塵
兩翁隔水俯晴淥韶光似水融芳晨
望中白雲無變態
我欲乘風聽松籟落花出洞豈世知
瑤池池上春千載

王虎臣

贈汪鶴丹

吾聞列仙之儒騎鶴飛明月為佩霓為衣又聞化鶴丁
令威七十甲子今始歸先生扁舟載蜚鶴五湖七澤將
安之江湖舊遊波渺渺牀頭金盡故人少猶能為客典
春衣酒邊豪氣天地小名賢歌頌題滿軸披圖亦自不
碌碌黃金白壁分與人惟有便便五經腹竭來訪我坐
羶冷岸幘扶筇微醅開樽促席意氣傾翦燭商詩寒
夜永星星斑鬢今如此清談自是青雲士試問煙波載

皜衣何如一舸攜西子

凌希惠

題畫馬

千里買駿骨絕足來異域尺素寫龍媒元非按圖索古
人觀馬在天機眼中不見黃與驪吾觀畫馬亦相類逸
氣橫出驪黃外王君下筆殊可人紫豔一洗凡馬群朝
幽暮越汗流血肯受青絡羈黃塵撫卷懷若人此意知
誰識泛駕固可奇在德不在力

韓信同

蓬萊飛峰

海上神山名自昔來去隨潮無定跡天人俯覽念虛浮
六鼇頂戴窮神力棲仙貝闕蕊珠宮多種瑤芝瓊草碧
依然根著不堅牢飛入石堂作南壁螺文螭跡石龍存
雲氣隨潮時雨濕仙風颯爽生羽翰招納霓裳羽衣曲
試登絕頂望五湖南接洞天纔咫尺藥爐灰冷多登真
九轉丹成人未識雲間鶴迹托來篇王鄧真人久相憶

薩都拉

過桐君山

桐山峩峩桐水清，仙人不住芙蓉城。
山頭笑指梧桐青，至今山水俱得名。
丹光夜照江水赤，赤浪神魚夜飛出。
碧桃花下覓神仙，白日山中遇樵牧。
江深谷響山有靈，東山人喚西山鷹。
漁人誤入水簾洞，石壁倒挂丹崖藤。
祠荒路斷行人少，石上清風長瑤草。
月明黃鶴飛渡江，仙人一去梧桐老。

題雲山圖

我有將軍萬疊青換得琅玕半窓綠月明恐有鳳來棲
日暮何妨雲借宿清時海宇無烽煙五風十雨歌豐年
看山愛竹了公事焚香挂畫似神仙城頭漏箭催更鼓
將軍夜寢元戎府怪底雲山光滿林牀頭斜挂三珠虎

題江鄉秋晚圖

沙頭潮下秋水枯雲山落日雲模糊草堂遠近路長驅
蕭蕭行李行人孤蹇驢渡橋歸思急村南村北天秋

色何處相呼雞犬聲山前山後煙樹立江風水面吹殘
莎打魚小艇如飛梭何人盪槳立船尾釣者船頭腰半
駝小李將軍不可作粉壁流傳愁剝落石門守者尤好
奇拄杖敲門索新跋京口綠髮參軍郎見君此畫心即
降攜家便欲上船去買魚煮酒揚子江

過桐廬

桐廬山水天下清洪濤拍岸山圍城桐君已乘丹鳳去
世間草木誰知情落日搖紅魚尾赤江上潮回沙嘴立

三三兩兩野人家半住漁村半樵牧盡拋章甫求仙靈
松間黃鶴喚不應阻風三日看山色平生慣識枯枝藤
碧桃海上開多少幾度春風長瑤草白雲滿地不歸來
石爛松枯天地老

吳真人京館畫壁

硯池花落丹水香步虛白日聲琅琅江南道士愛瀟灑
新粉素壁如秋霜王郎酒酣衫袖濕醉眼朦朧電光急
元龍雲重雨脚斜白兔秋高月中泣倦游借榻日觀東

恍惚夜夢三湘中
鷓鴣聲斷江路遠
青林雨暗春濛濛
寒夜與王記室宴集

欲雪無雪風力強
欲睡不睡寒夜長
玉奴翦燭落燕尾
銀屏煮酒浮鵝黃
二君豪飲不可敵
醉倒綠髮參軍郎
夜深大吟且就枕
明朝萬瓦看晴霜

馬翰林寒江釣雪圖

天寒日短烏鴉啼
江空野闊黃雲低
村南村北人跡斷
山後山前玉樹迷
歌樓酒香金帳暖
豈知篷底魚羹飯

一絲天地柳花春萬頃煙波蓮葉晚風流不數王子猷
清興不減山陰舟人間富貴草頭露桐江何處尋羊裘
還君此畫三歎息如此江湖歸未得洗魚煮酒卷孤篷
江上雲山好晴色

織女圖

蘭閨織錦秦川女大姬啞啞弄機杼小姬織倦何所思
簾幕無人燕雙語成都花發江水春門前馬嘶車磷磷
髻鬟兩珥看欲墮蛾眉八字畫不伸良人一去無消息

冰蠶吐絲成五色柔腸九曲細於絲萬縷春愁正如織
綺窓睡起聞早鶯西樓月落金盆傾暖霞拂地海棠曉
香雪潑戶梨花晴日長深院機聲動梭影穿花飛小鳳
水心驚起鴛鴦棲花底不成胡蝶夢纖纖玉指柔且和
香鉤小襪裁春羅滿懷心事付流水盪日雲錦生層波
佳人自古多命薄風裏楊花隨處落豈知醜婦嫁田家
生則同衾死同椁君不聞長安世上花滿枝東家胡蝶
西家飛籠中鸚鵡喚新主門外侍兒更故衣又不聞田

家婦日埽春蠶宵織布催租縣吏夜打門荆釵布裙夫
短袴我題此畫三嗟吁百年醜好皆虛無排雲便欲叫
閭闔為我獻上幽風圖

題陳所翁龍

畫龍天下稱所翁禿筆光照驪珠宮長廊白日走雲氣
大厦六月生寒風興來一飲酒一石手提元兔追霹靂
漲天煙霧晴不收頭角崢嶸出牆壁全形具體得者稀
今日海邊親見之滿堂火燄動鱗甲倒挾海水空中飛

凌風直上九天去
天下蒼生望甘雨
太平天子居九重
黍稷穰穰千萬古

登樂陵臺倚梧桐望月有懷南臺李御史藝七
夕後一日也

涼風吹墮梧桐葉
瀉下泠泠露華白
樂陵臺上悄無人
獨倚梧桐看明月
月高當午桐陰直
不覺衣沾露華濕
此時却憶在金陵
酒醒江樓聽吹笛

送陳衡之之金陵

買舟上溯金陵道寒江水落波浪小片帆遙挂蔣山青
空城畫角秦淮曉白門美酒滿城春吳姬喚客客不行
樓中子弟皆年少玉奴送酒吹鸞笙陳郎不聽黃金縷
朝之東吳暮西楚半生落魄一布袍感慨長歌弔千古
六朝遺跡生暮煙故宮衰草埋花磚鳳凰臺上醉李白
何人知子囊無錢

送王伯循御史赴廣東僉憲時僕將回燕京

沙頭酒盡惜別離江波日色浮繡衣清溪柳花白蕩蕩

白下柳樹青依依秋雲雙驄嶺表去明月一鴈燕南飛
曲江水發願相憶莫遣鯉魚音信稀

江上聞笛

江上何人吹竹笛水冷沙寒龍夜泣鮫人水底織冰綃
灑淚成珠露華濕銀河耿耿波茫茫鴈奴打更沙溆傍
更深繡被夜寒重明月梅花滿地霜

過魯港驛和貫酸齋題壁

吳姬水調新腔改馬上郎君好風采玉郎一去春草深

謾有狂名滿江海歌詩呼酒江上亭墨花飛雨江不晴
江風吹破峨眉月我亦東南西北征

過淮河有感

淮水清河水黃出山偶爾同異鄉排空卷雪勢莫當隨
風逐浪庸何傷東流入海殊不惡萬里同行有清濁

高郵阻風

離家十日得順水不卸蒲帆一千里忽然今日風打頭
寸波寸水逆上流小兒造物不可測昨日南風今日北

黃郎束手篷下眠盡日閒看順水船順船得勢如馬走
相望招呼不回首長風破浪我亦曾順逆偶爾非人能
中秋前二夜步至吳江垂虹橋盥漱湖渚而歸
倚篷望月清興翛然因成數語

萬頃太湖風浪靜玻瓈倒浸虹蜺影瀼瀼露滴金波流
一筇獨立秋雲冷步回長嘯倚篷窓月華正在青霄頂
過嘉興

三山雲海幾千里十幅蒲帆挂煙水吳中過客莫思家

江南畫船如屋裏蘆芽短短穿碧沙船頭鯉魚吹浪花
吳姬盪槳入城去細雨小寒生綠紗我歌水調無人續
江上月涼吹紫竹春風一曲鷓鴣吟花落鶯啼滿城綠
阜林道中

春溪野鴨肥可射幽樹陰深叫山鷓鴣遠人三月酒船過
柳絮飛時杏花謝行行水竹與雲林往往人家或僧舍
小官便欲賦歸來何處買山錢可借

遊吳山紫陽菴

天風吹我登鼇峯大山小山石玲瓏赤霞日烘紫瑪瑙
白露夜滴青芙蓉飄綃雲起穿石屋石上涼風吹紫竹
挂冠何日賦歸來煮茗篝燈洞中宿

和韻三茅山呈張伯雨外史

碧桃花落蓬萊宮銀屏甲帳圍春風冰簾卷水玉堂靜
白露滴月銀牀空仙人夜酌九霞酒手握北斗傾尊中
梧枝落影鳳凰語幽韻彷彿臨蒼穹伐毛洗髓天地老
火鼎夜出芙蓉紅呼龍洞口種瑤草採藥忽遇松間童

茅君自騎一虎去猶聞珂珮聲
丁東武華山人三載別
綠袍赤杖蒼髯翁淮南江上復相見
落日淡淡天無窮
明朝稽首渡江去楚水清淺銀河通

夜泊釣臺

雙崖屹立幾千仞下有一葉之孤舟
繁星亂垂光眈眈
長藤古木風颼颼荒祠幽黑山鬼集
怪石如人水邊立
錦峰繡嶺雲氣深萬壑千巖露華滴
山僧對話夜未央
不知風露滿衣裳喚船振錫渡江去
林黑無由歸上方

高寒宇宙無人語
亂石灘聲濺飛雨
欲從嚴子借羊裘
坐待船頭山月吐

題喜里客廳廳雪山壁圖

一年在京口雪片深冬大如手
獨騎瘦馬入誰家四面
雲山如戶牖大江東去流無聲
金焦二山如水晶瓜洲
江口人不渡時有蓑笠漁舟橫
一年在建業臘月梅花
滿城雪五更凍合石頭城
霜風鼓寒冰柱裂秦淮酒樓
高十層鍾山對面如銀屏
鷺洲不見二水白天外失却

三山青一年在鎮陽燕山積雪飛太行潯沱冰合斷人
跡井陘路失迷羊腸長空萬里絕飛鳥卷地朔風吹馬
倒狐裘公子獵城南茅店酒旗搖樹杪今年入閩關馬
蹄出沒千萬山瘴煙朝暮氣靄靄石泉日夜聲潺潺雪
花半落不到地但見晴空湧流翠海頭鼓角動邊城木
末樓臺出僧寺何人蹇驢踏軟沙出門無處不梅花江
潮入市海船集水暖遊魚不用叉良工畫出雪山壁過
眼令人憶南北玉京銀闕五雲端待漏何年鳳池側

畫馬

漢水揚波洗龍骨
房星墮地天馬出
四蹄蹀躞若流星
兩耳尖脩如削筆
天閑十二連青雲
生長出入黃金門
鼓鬃振尾姿偃仰
食粟何以酬主恩
豈堪碌碌同凡馬
長鳴噴沫奚官怕
入為君王駕鼓車
出為將軍靜邊野
將軍與爾同死生
要令四海無戰爭
千古萬古歌太平

曉起

烏鴉啞啞霜樹晴
紙窓潑眼春雪明
野人卧病睡方起

官街踏踏聞馬行矮窓小戶坐終日煮茶繞坐松風生
明朝呼兒刷駿馬出門一笑青天橫

為九江方七高賦

匡廬山中有高士讀書結屋青雲松碧窓夜影紫翠動
落日照見香爐峰窺燈夜壁山鬼過采蘭東徑仙人逢
危簷墮雪聽風竹古寺隔嶺聞煙鐘每思幽絕動歸興
歲晚落葉迷行蹤扁舟何日過湖口分我半壁青芙蓉

曉上石壁灘

龍溪三月人上船十里五里灘聲喧浪花飛雪灑石壁
船尾落月傾金盤越兒卧篙頭刺水露重布帆風不起
近山鐘動石樓中隔水雞鳴煙樹裏過江日日水與山
詩人得趣如得官白雲遙在太行北何日歸舟下石灘

雲際感興

昨日登芝峰茲晨陟雲嶺俯視城中居萬瓦落深井風
露灑灑生秋寒飛泉落澗聲潺潺筍輿軋軋度脩竹石
闌曲曲躋層巒層巒絕頂天尺五我欲排雲擊天鼓九

關虎豹不須驚吐膽開心見天語天鼓不可擊天門何
日開請君聽我紫芝曲手招白雲歸去來

繡襖

羅裙習習春風輕蓮花帖帖秋水擎雙尖不露行復顧
猶恐人窺針線情縑雲隱映籠新月花影依稀襯香頰
彩鳳將翔相顧飛鴛鴦謾語愁丹裂落紅濕透臙脂膩
半幅凌波翦秋水莫教踏破浣溪沙濕重東風擡不起

枯荷

紅雲一夢何茫茫綠縈瘦骨擎欲僵愁多有魂弔秋水
故池日夜淒新霜鴛鴦相顧魂已泣白魚起身銀尺立
堂中書客感秋風一片青衫和淚濕

春別

花氣壓簾愁不埽細雨粼粼長芳草玉釵燕尾翦春寒
坐惜流年鏡中老東風吹柳人不知春嬌滿眼顰雙眉
吳松錦字夢中得曉來月落聞烏啼南園日暖蝴蝶醉
香霧熏人海棠睡朱門小立蹴金蓮落紅起作離人淚

觀音努

四見亭

卧麟山前江水平卧麟山下望行雲山雲山柳歲時好
江水江花顏色新長江西來流不盡東到滄海無回津
我欲登臨問興廢今時不見古時人

郭囉洛納新

桃花山水圖為桃源屠啟明題

天台山下雲無數山南山北多桃樹石洞春寒風雨深

落花半逐溪流去人間從此識仙家
短櫂尋源到水涯
翠袖乘鸞下明月玉盤留客進胡麻
我昔捫蘿探幽谷
青精煮飯松邊宿至今瞳子有神光
細字猶能深夜讀
高人築屋石溪東溪山却與天台同
粉黛含情記幽趣
碧桃流水春溶溶六月黃塵汗如洗
獨騎瘦馬京城裏
忽見新圖雙眼明拏舟欲泛滄浪水
我家只在蒼崖巔
白雲繞屋清溪連他日君能遠相覓
看花酌酒春風前

送太尉掾潘奉先之和林

御河冰消春欲暮官船繫著河邊樹河邊日日送行人
撾鼓開帆盡南去潘郎作掾獨未還腰弓却度居庸關
馬上長歌一回首關南樹色青雲間七月金山已飛雪
牛羊散漫行人絕夜深陡覺羶帳寒酒醒只聞笳鼓咽
丈夫莫恨不封侯食肉須當萬里遊腰間拂拭黃金印
他日相逢尚黑頭

賦鸚鵡送僕世南廉使之海南

朱崖擅珍鳥鸚鵡獨專名滿庭榕葉春晝晴飛來却向

花間鳴三月蠻江春水綠日斜還傍江頭浴弱羽翻風
濕翠流爪痕蹴浪珊瑚束間闕更作斷腸聲水流花落
難為情烏臺使君午夢醒隔簾細雨春冥冥

巢湖述懷寄四明張子益

憶昔移家東海上萬斛龍驤跨鯨浪三神宮闕渺何許
弱水茫茫空悵望前年去作燕山遊羸驂短褐風颼颼
昭王臺前月似水荆卿驛畔天如秋病骨苦寒情苦倦
南下瀆河疾於箭清晨雙櫓發呂梁黃昏已泊桃源縣

生來每歎蜀道難去年我亦登蒼山馮公嶺頭日不到
肩輿履雪梯屨顛僕夫緣崖如凍蟻下頰鐔山深澗底
人家半出松樹頂白雲却向山腰起今年四月江西歸
小姑正對彭郎磯三更挂帆海門過一川草樹浮晴暉
我生胡為自役役孟浪江湖竟何益清霜鏡底縈鬢絲
坐對篝燈空歎息愁來鬱鬱不可當結交賴有張家郎
臨風同歌紫芝曲埽石大醉黃金觴我家南陽天萬里
十年不歸似江水秋來忽作故鄉思裹劍囊衣渡揚子

玩鞭亭下江縈紆淮山楚樹青扶疎一帆西風出巢縣
眼明墮此清冰壺湖水漫漫接天杪天低更覺青山小
倦飛沙鳥戛漁艇倒影芙蓉涵碧藻涼波不動舟如飛
櫂歌窅窅聲相隨江東雲樹轉頭失淮西山水尤清奇
故人江南不可見千里相思情眷戀門外梅花知未發
屋頭柿葉題應徧期君不來爭奈何青天落日搖滄波
明年歸來賀山下與君共讀巢湖歌

田家留客圖為四明劉師向先生賦

客來田家當六月主人相留樹邊歇呼兒牽馬飲清泉

廚裏新漿解君熱郎君出城幾日前城中米價今幾錢

昨夜南村三尺雨不知還到城濠邊勿厭儂家茅屋小

棘門新編土牆繞明朝早飯莫忽忽雞鳴送君出官道

予有山水圖留倪仲愷大師齋中久未得題品

一日危太樸應奉謂予曰昔人皆以酒解醒子

能作歌求詩亦此意也遂成古詩一章以趣之

野人築屋青山底綠篠娟娟蔭秋水天涯作客想江南

乞君題詩畫圖裏畫圖疊嶂雲鉤連汀花岸草依然
對此令人動歸興却思把釣清溪邊一束殘書挂牛角
大笑青天看日落窓下孤燈夜雨深人間萬事秋雲薄
明年我亦去山陰君歸泛雪須相尋草堂下榻看圖畫
與君酌酒聽君吟

陳旅

陳新甫生日出紅玉盃飲為賦

崑崙東阿含海日石中玉子如日赤神工夜發昆吾刀

剗作金盃盛酒喫蟠桃初開緜母家丹露滴如芙蓉花
廣陵公子酒如海年年顏色襯朝霞

題遼人射獵圖

美人貂帽玉驄馬誰其從之臂鷹者沙寒草白天雨霜
落日馳獵遼城下塞南健婦方把鋤丈夫邊戍官索租
和蕭秀才歌風臺

歌風臺前野水長王媪賣酒茅屋涼酒邊父老說劉季
頭戴竹冠歸故鄉山河霸氣已消歇颯颯老柳吹斜陽

臺前小兒更擊筑筑聲更似三侯章


御選元詩卷二十八

謹案第二頁前六行怒風鼓浪屹於城刊本於作
如複下淒迷瀕瀕恍如見如字據吳萊淵穎集
改

第十七頁前七行今昔人殊同此月刊本此訛比
據許謙白雲集改

第十八頁前七行我來正值窮冬月倚杖巖前嚼
松雪刊本杖訛秋據許謙白雲集改





總校官庶吉士臣侍朝

校對官檢討臣蕭九成

謄錄監生臣朱文佐

欽定四庫全書薈要

集部

御選元詩卷二十九

詳校官原任主事

臣
李斯咏



欽定四庫全書薈要卷一萬八千四百四十一

集部

御選元詩卷二十九

七言古詩六

李沔

留別金門知己

并序

我本山人素志丘壑獲歸名山為願畢矣爰以四月十一日離京師是夜抵潞陽慨然賦詩遙慰匡廬隱者并示金門諸公為一喙云



野馬脫羈鞅，倏疑天地寬。臨風一長鳴，風吹散入青冥間。頗如魯仲連，蹈海不復還。又如安期生，長留一島令人看。江南浩蕩忽如海，落日照耀浮雲關。既不能低首伏氣摧心顏，詭遇特達驚冥頑。又不能抱書挾策千萬乘，調笑日月相迴盤。匡廬迢迢接仙山，仙翁泛若秋雲閒。長松之陰引孤鶴，望我不見空長歎。采鉛天地津，飲醪桃花灣。蒼梧倒影三湘寒，赤城霞氣生微瀾。鯨鯢翻空海波赤，曉色欲上扶桑難。人間之樂兮，誠不足恃何。

如歸卧棲巖巒棲巖巒卧巖穴夜半天風吹酒醒猶有
西溪萬年月

月夜過采石江呈樵隱學士兼示吾徒李止順
文

空江偃仰見明月月向天心散冰雪捫天恍忽與之脗
桂樹瓊枝紛糾結倏挺枯槎汎河漢又似山陰理歸楫
美人不來江水深獨對風煙正愁絕欲愁絕兮奈此懷
征帆茫茫江上開黃蘆風起鳥聲至千里一望銀山來

銀山差我隔滄海海上群仙復誰在五鼇已沒三山沈
扶桑葉條失光彩丹砂不逐兒童歸曠懷更為秦人悲
英雄去國彼其志想像金闕空歲蕤笑呼白雲觴我酒
翠疊連山作窓牖狂風吹月落西去水氣冥冥浴星斗
夜深忽到蛾眉亭紫鱗欲去江潮生只愁新詩幻出龍
虎文翩然將我日月元氣歸滄溟

劉致

望夫石

望夫山頭日欲頽望夫山下江聲哀山頭日日風雨惡
江上不見行人回高山亭亭幾朝暮獨記行人去時路
知君渡河長不歸恨不當年逐君去此身化作千仞磯
石猶可轉心不移長江水涸黃埃飛行人應有歸來時

王瓚

題赤壁圖

我昔南遊過赤壁曾上磯頭訪遺跡吳魏勝負了無聞
一歌漁歌楚天碧黃岡遷客我翁道同北海人中龍

羈懷得酒逸興發扁舟夜汎空明中江山如許誰賓主
醉挾飛仙夢中語直將天地等浮漚三國周郎曾比數
神遊八極空畫圖開卷彷彿瞻眉須清風千古凜如在
悠悠目斷江雲孤

傳若金

奉題達兼善御史壁間劉伯希所畫古木圖

遠樹含幽姿近樹亦古色水傍嘗見畫不得乃在君家
中堂之素壁青林寂寞行人窈白澗微茫斷煙隔入門

蕭蕭雲氣生落日便恐歸禽爭耳後颯爽寒風聲知君
夜眠愁雨黑留客晝坐宜秋清劉侯學李成畫手稱獨
步時見作古松盤屈百怪聚中林一株直且良安得劉
侯寫其趣

送奎章閣廣成局副楊元成奉旨之徽州熟紙
因道便過家錢唐二首

新安江水清見底水邊作紙明於水兔白霜殘曉月空
鮫宮練出秋風起五雲高閣染宸章最憶吳牋照墨光

明朝驛使江南去詔許千番貢玉堂

綠槐五月高雲冷行人辭闕瞻鄉井奎壁秋迴帝座深
斗牛夜隔天河永君今銜命出江關却到徽州幾日還
天上應須朝絳節湖邊何得愛青山

立春日對雪

帝城東風作春雪千花墮地吹還滅雲氣微分五鳳樓
日華稍動蒼龍闕天涯對節每思親况復愁中數見春
坐憶高堂獻生菜朝來說著遠行人

題寫御史海鵑圖

空庭海鵑誰所狀海氣初高鵑神王雲脚西騰弱水涯
潮頭東出飛霞上此時扶桑色始分下視百鷺空其群
日中金烏側相避籬下凡禽何足論

孫伯大山水圖

齋居胡為見雲壑白日虛嵐滿秋幌何水深蟠地底回
層崖險歷空中上蒼茫不知開闢始只尺須論數千丈
林端遠岫微有無巖畔精藍蔚蕭爽雜樹縣羅拂輕黛

寒松覆谷含清響仙源或在人間世洞口孤舟欲長往
嗟我平生最漂泊中年萬事何鞅掌憶昨征行多所經
至今絕境懷幽想雷霆半夜山忽至風雨三春石應長
對坐聊歌隱士芝無因一試仙人杖

黃鉦

游張公洞

碧水漣漪漾流藻指點蒼煙即蓬島煙開遠見燒香臺
攀蘿陟磴升崔嵬群仙之居萬松頂陡然身世星河冷

虛中泳洞隔塵凡道人邀我游其間洞中紛紛白鶴舞
石上采采靈芝殷仙童燭燒先余去脚底濛濛起雲霧
經渡青螺過澗橋直到仙人下棋處

黃清老

丁卯及第歸和揭經歷見賀詩

兒時見月欲上天崑崙獨往三十年山深染得秋水綠
所思忽到梅花邊螢燈照雪心炯炯危坐空齋似禪定
落花啼鳥意不驚澗瀑松風自相應書成上謁天帝君

半夜掣起扶桑雲麒麟崢嶸列萬戶虎豹戛鼎懸千鈞
翠盤八珍為君薦劒佩鏘鏘揖群彥木天日上五色雲
知有百靈護經傳春城如海花滿園狂吟中有白與元
至今風雨飛動意垂楊起舞花能言銀潢東流幾時了
松下夢回秋又曉蒼蒼此意誰得知蟾闕佳人霜雪皎

題胡修撰金華雜興小橐

吾聞金華之山東南峰石壁巉起如飛龍滄溟盤礴幾
萬里但見扶桑日影倒挂金芙蓉山中仙人古愚老青

霞落落雲間松翩然獨去遊無窮謁帝西上崑崙宮春
苔染水碧於酒輦路人家插楊柳金莖露瀉明月珠散
落人間作星斗君不見西山日上紫氣橫花下有人調
玉笙太平擬進九成樂五雲樓閣生秋聲

上繼學王公

大風卷地沙塵昏十日不得一出門眼中俗子浩於海
思欲一見雲中君雲中之君玉為節鴈冠戔戔照晴雪
振衣驚落琪樹花片片人間作明月有時霹靂生風雷

松聲曉落青崔嵬衆芳收雨作春色瑤草綠遍三蓬萊
有時筆端吐光怪干將生花玉龍蛻廣寒天上聞步虛
萬壑千崖起秋籟嗟余困學無所成仙家幸識黃麒麟
願從輞川覓詩法白鷗飛入南山春

題高都事戴嵩二牛圖

東風吹浪翻平林吳江只尺移春陰牧童曉出不知雨
日暮歸去青溪深一童驅牛涉古岸草煙慘澹迷目觀
雙蹠湧出層水間蒼峽蹴翻石雲斷一童踞策溪中流

溪風不動波悠悠恍然顧影驚自失尚疑身跨蒼龍遊
平瀾遠峰結寒色至今宇宙留墨跡可憐三子人不識
我欲問之漢津客

登平遠臺鼇頂峰

六鼇簸蕩元圃碎三島崩騰失空翠海風掣斷南山雲
分我滄江半江水臺南巖谷青岌岌奇松怪石作人立
山巔恐有風雨來林徑空濛落花濕水東劣削結平綠
積霧飛嵐坐堪掬蓬萊迢迢幾萬里一碧天光浸寒玉

吟翁回首看不足緩步策驢度空谷誰知只尺山中幽
望斷殘暉立修竹

天馬山

溪隨天馬西北行半空忽見蓮花生雙鸞欲下却飛去
旌旗引入丹霞城攀蘿上到猿嘯處恍然曠坐消百慮
千山無人雲氣深終日徘徊不能去虛空樓閣時自開
異香忽起三清臺風吹笑語落天半疑是神仙跨鶴來
百花潭上春自照白鹿呼人猿亦嘯路迷不敢輕問津

恐有賢人隱畊釣蒼崖九折樵徑通絕頂可見西崆峒
塵心豁然臂欲羽竦身直上凌天風

江學庭

題雙虹橋

雙虹鎖湖湖水長影搖洞庭吞三湘霜飛八月橘柚熟
我欲打船聞水香晴天晚照過湖曲歷歷遠樹波茫茫
客中有懷不得盡無人同上三高堂

段輔

登岳陽樓

羣江西來與天平天壤巨浸開洞庭雄吞三湘隘七澤
中蟠萬古君山青我行持節按廣海驛騎暫駐巴陵城
巴陵城樓冠天下風軒月戶雲霧屏平生夢想今始到
危闌乍倚心魂驚初疑太極渾未判日月往復凌空明
又疑此世墮物外弱水萬里環蓬瀛湖山得意有如此
况乃佳客聯簪纓金杯浮動玉色酒滿抱清思春雲生
龍魚掀舞怒濤起眼花落日搖青冥軒皇廣樂渺遺響

芳洲寶瑟愁湘靈丹丘謫仙竟何許幾欲八表追遐征
孤心未了忠孝願敢念綠髮潛凋零聖神一視無遠邇
恩風化雨浹四溟尋常嘯聚犬豕爾瘴煙一洗霜天清
歸鞭只尺覲慈母細語八千山水程孰能閉置若新婦
正要磊落肝膽橫飲酣拂袖下樓去忽聽過雁雲邊聲
侯賓于

送張漢英之金陵

平生不願為傭書亦不願作章句儒酒酣詩成吐素霓

意氣凜凜吞千夫去年排雲叫閭闔出門一夜車四角
今年踰嶠席未溫一舸乘潮又催發大江之西日本東
廬陵人物嘗稱雄決科歲占十八九君當努力揚辭鋒
才高不用長太息四海彌天豈無識壯年懷居亦何有
著眼帶礪開胸臆霜臺屹屹凌高寒豪士傾蓋宜交歡
我知屠龍不屠豨食馬正欲食馬肝吳姬壓酒吹香絮
謫仙神遊歌白苧敬亭惟有孤雲閒欲雨人間亦飛去

喀爾布哈

題夏禹玉煙江疊嶂圖

大江來自岷山遠萬里東流幾深淺洪濤巨浪日春撞
一派西隨萬山轉萬山峩峩翠黛浮大孤小孤當中流
高城遠出武昌樹衰草微連鸚鵡洲茅屋人家住深島
雞犬不聞人跡少幾行歸雁日邊來一幅征帆天際小
湘南雨歇秋風清落木黯淡哀猿聲荆門月出夜潮長
九疑山碧秋雲橫我生自是優游者足跡何曾半天下
長江萬里欲神遊却喜今朝見圖畫圖畫再展未得休

似有模糊寒具浮只恐通仙忽飛去驚絕當年癡虎頭
趙友蘭

清明述懷

東風吹春桐始花青青柳枝插簷斜內園小兒得新火
紫煙已遍金張家雙鸞吹笙調鶯舌起踏秋千弄明月
夜深步轉玉闌東笑倚梨花一株雪

岑安卿

次韓明善題推篷圖

青松陰陰間修竹六月翛然破炎溽梅花一味只宜冬
江上孤舟水邊屋筆端春信回孤根鮫綃淺抹清霜痕
江南煙雨正愁絕一枝喚醒羅浮魂無聲詩生有聲畫
吟咏工夫見揮灑坡翁仙去二百春夢繞松風古亭下
茲花清致誰堪當孤山題品淵源長推篷細認心淒涼
鼻端彷彿聞天香

題晴川圖

清溪粼粼生淺花曉日倒射搖金沙翩然雙鷺下危石

玉雪照影無纖瑕溪邊小景入圖畫青煙綠樹漁翁家
漁翁歸來歌未終鷺鷥忽起蘆花風回眸遙望不可極
但見白玉飛晴空昔年夜宿瀟湘浦徹曉不眠聽急雨
解衣曳杖立沙頭何似今朝得容與長安馬寒泥沒腹
雪滿朝衣凍肩縮試令援筆題此圖長篇應賦歸來曲
二月二日大雪偶賦時寓州郭

東風吹寒春漠漠海氣作暝天昏昏空階夜落雪一尺
起看萬樹梨花雲詩翁撚鬚僵不死開窓強作飢猿蹲

欲呵凍筆寫清思甕中餘瀝催頻溫山僧積財富畎畝
驅馳役事何紛紛木魚停撾磬聲絕但聽衙鼓趨公門
何如孤舟釣魚叟一蓑獨釣寒江濱

予觀近時詩人往往有以前代臺名為賦者輒
用效顰以消餘暇

姑蘇臺

吳王築土山為址俯視水雲三百里臺中歌舞萃華麗
金碧巒岼眩珠翠江花泛泛浮鷗夷會稽思霸甘卑辭

千金不買西子笑一舫竟逐陶朱歸丹砌草深麋鹿卧
淒淒棘露沾人衣闔廬丘墓虎為衛至今鐘磬聞餘悲
遊人不悟國傾亡松間援筆題真娘

朝陽臺

巫峯十二青參差石形儼現仙娥姿蒼藤翠木怯淒冷
精誠夜感襄王思仙衣縹緲仙裙濕雲影飄颻雨聲急
陽臺朝暮不勝情高唐想像愁無極夢中奇遇事杳冥
公子雕辭亦胸臆荒涼古廟屹江干臺空不見行雲跡

遊人悵望尚徘徊古碑寂寂荒莓苔

戲馬臺

彭城負險河為障南屹崇臺勢雄壯重瞳奮跡入秦回
諸侯攬轡皆東向酒酣蹴馬升崔嵬髮翻鬣振雲煙開
倚鞭四顧示無敵指揮貔虎心雄哉黃金間行亞父去
帳下茫然失謀主楚歌聲合潰重圍昔日名騅空故步
千年積恨氣未消繞臺泗水撞飛濤

鳳凰臺

萬里長江東入海千年高臺今尚在當時誰道鳳凰來
覽德何人足相待鳳聲悠悠梧葉空謫仙文采流長虹
跨鯨一去不復返後人欲語羞雷同海上三山渺何許
群仙騎鳳隔風雨登臨空詠謫仙詩白鷺斜飛過秋浦
八月上旬出遊晚歸

栲峰老人頭雪白竹扇如箕障炎赫徐行阡陌稻花間
稚子歌呼手高拍西風吹我衣巾輕鷺鷥飛起鵲鴿鳴
西山一餉挂龍雨薄暮歸來新月明

題張彥明所藏翦紙惜花春起早圖

流蘇帳卷春寒輕紗窓弄碧天微明
輦紅嬌紫怯朝露
美人推枕心為驚鬢雲未綰香奩開
侍兒側立肩嬰孩
黃鶯飛動花影亂停梳睨猶相猜誰
將妙意寄工巧
溪藤雪瑩金刀小丹青退舍松煤枯
翦出天真數分杪
筌熙傾軋空自誇惟競時人顏色好
無聲有聲兩相副
此景此詩均壓倒司空見慣了無言
應是禪心被花惱
求葉仲輿寫墨竹扇面

此君一日不可無子猷篤愛心歡愉延平官舍斬伐餘
稽山倦客心煩紆先生拋官南海來胸中丘壑爭崔嵬
筆端造化奪天巧籀龍一夜驚春雷素綃團團翦秋月
願染元霜寫幽絕蕭然便覺風雨生頃刻清寒屏炎熱
昔時與可稱絕倫息齋近世尤逼真我持此扇出門去
要使襪材咸萃君

逢秋

高梧脫葉金井寒壁月夜挂珠闌干銀河萬里浸虛白

凌風欲訪乘槎仙，金壺箭水聲第一。
畫角梅花聽淒惻，三山樓閣碧海涼。
老鶴不眠清露滴。

謝李仲容見贈

海風立水天空濛，瘴雲畫掩蓬萊宮。
仙人跨鶴天姥東，歸來樓閣昏無蹤。
九仙山高玉為戶，廣寒夜訪乘鸞女。
桂香滴露夢不成，看徹霓裳羽衣舞。
宮袍舞錦花翩翩，詩成毛骨生清寒。
飛章贈我歸剡川，推篷月在梅花邊。

周權

徐仲晦作書惠水墨梅圖有和靖題紀歲月絹
素蠹敗餘字不存作詩歸之

溪藤擣霜寒奪目硬黃瘦字疎相續墨花出袖吐春妍
一片玲瓏水蒼玉分明寄我孤山圖上有歲月書林逋
古丹漫漫篆窠暗敗素颺颺形神枯西泠橋畔黃昏景
船頭鶴夢風吹醒一從馬鬣鎖荒寒萬古人間幾香影
苦吟老盡詩壇豪窮愁到我心徒勞還君此畫三太息
雪晴月映橫窓梢

惠山寺九龍峰下酌泉

惠山鬱律九龍峰磅礴大地包鴻濛劃然一夕震風雨
欲啟靈境昭神功六丁行空怒鞭斥電火搖光飛霹靂
一聲槌破老雲根嵌洞中開迸寒液道人甃玉深護藏
鏡涵萬古凝秋光陸翁甄品親試嘗翠浪煮出松風香
我來山下討幽境自挈餅罌汲清冷味如甘雪凍齒牙
紺碧光中敲鳳餅昏塵滌盡清淨觀心源點透詩中禪
亟呼陶泓挾元玉揮灑字字泉聲寒投閒半日聊此駐

孤櫂明朝又東去紅塵人世幾浮雲鐘鼓空山自朝暮
次韻徐景端席上

洞庭霜橘包黃銀海邊丹荔輸閩珍高堂開筵薦華俎
風味雋美懷芳新蒸花厭玉飮蔗炙雕盆犀筋行鮮鱗
紛紛歌管奏名妓秩秩簪履羅佳賓芳尊細酌綠琬琰
寶罍共擁紅麒麟燒殘絳燭轉留客疑有四角生車輪
書生商歌風雨室此志鬱鬱何由伸短衣穿肘不掩脛
五窮相與為雷陳青陽開動生意達短翅亦擬凌空雲

豫章遠志各有適黃鐘瓦缶俱陶鈞且安麤糲槃澗濱
未厭紫豉羹吳蓴

赤壁泛舟

赤壁之山何峻嶒下有江水何清泠天空月出夜寥泚
玻瓈萬頃涵秋冰為問黃州雪堂老遷官何如謫官好
酒酣攜客夜拏舟憂患都將談笑了劃然長嘯來天風
神遊八極世慮空但見橫江秋露白錯落低垂斗柄紅
舉袂欲挹浮丘公洞簫聲斷潛蛟舞月下清樽貯千古

老瞞當日困周郎十萬樓船鬪貌虎煙銷水冷沈戈矛
空餘野燐寒沙頭江山牢落滿陳跡追憶往事懷風流
勝遊到我知幾度感昔視今猶旦暮乾坤何事老英雄
袞袞長江自東去

子陵釣圖

東都熱官手可炙吳儂面似秋江色平生落拓一羊裘
七葉貂蟬不堪易功臣盡在雲臺中丹青化作灰塵空
先生遺貌乃在此釣竿尚裊桐江風悠悠世事江雲白

過眼輕帆自朝夕人間萬古仰孤風
天上有星猶是客

錦雞

巴山靈鳥初離群歲蕤麗組雲錦
文羽翎新刷爪距利采色勝似沙
頭鴛鴦晴暎入戶爛相射
喙中有物垂紅碧綬光若若花盤
條出示山童有矜色文章固足媒
爾身雕籠拘束還悲辛區區啄飲
豈不厚情深野樹溪雲春
赤霞夜出扶桑東海雲捲浪凌虛
空剛風浩浩吹不去

焦山寺

崔嵬化作青蓮宮萬衲月寒清楚寂四面沈沈皆海色
鐘聲不許到人間自送潮音落寒碧

舟行阻潮

江流浩浩吞長天打篷巨浪翻銀山篙師維舟不敢發
東望微茫盡溟渤荒邨古渡生客愁丹楓落葉秋颼颼
夜半西風卷江雨咿軋數聲聞過櫓風收雨霽晨氣清
金烏蕩漾波間明舟人歡呼指歸路十幅蒲帆順風去

夜泊吳江

彌茫巨浸無坤軸溶溶一鏡天東北兩虹渴飲駕空來
千尋橫截玻瓈碧齧堤駭浪飛晴雨晦冥白晝蛟鼉舞
萬家燈火水晶宮令肅貔貅夜撾鼓斗柄銜城湖月白
清愁惱我江南客安得風流張志和共醉漁舟擘長笛

金山龍游寺

金山突兀摩青冥六鼇駕海來蓬瀛風濤卷雪撼不動
中流湧出毘耶城山僧眼底乾坤闊俯瞰朝暾乘落月
鐘聲薄暮來蜃樓燈影晴宵入蛟窟馬銜韜怪蒼龍蹲

聽法卧護孤雲根參旗歷落倚闌楯金碧照耀滄海門
天光萬頃涵虛碧扁舟獨艤玻瓈國六朝興廢幾英雄
往事雲浮江露白窮高一覽雙眼明天風灑我毛骨清
淮山數點不可寫矯首九萬搏風鵬

八里莊渡淮入黃河水渾不可飲過徐入清河
水方澄潔信筆閒記

河流汨汨如涇水濁浪崩騰疾馳駛一石中膠數斗泥
舟客居民皆飲此黃河不復行故道下注清淮通海涘

十人度索上一洪寸寸強弓挽難起屹然跌坐如僧禪
日與篙師同愠喜青山一髮認邳州蕭條莫上魚豚市
酒邊一笑我何為獨冒驚濤行萬里爭如林下混漁樵
俛仰嘯歌行復止回頭寄語北山雲征塵待向風泉洗
徐州暮泊風雨驟至

清河綠漲琉璃堆黃河濁浪排空來兩流合一混涇渭
噴薄東注無時回孤城迤邐枕其左晝夜怒激聲喧阗
人煙蟻集一閨市夕陽孤塔空崔嵬客舟簇簇鬧河許

極目但見煙中梳黃壚呼酒足自慰愁城頓破紅顏開
須臾笑電急驅雨神物變幻令人猜狂飈揚沙昏白晝
黑雲卷地翻風雷

雞鳴臺

橫空陣氣長雲黑戈鋌照耀旌旗色龍跳虎躍神鬼愁
漢楚存亡一絲隔相持兩地皆雄據楚力疑非漢能拒
瑞啟炎圖芒碭雲悲歌霸業烏江路空餘故壘傳遺跡
離合山河幾勍敵戰塵吹盡水東流落日沙場春草碧

魯橋

泗河汨汨流青銅魯橋突兀橫長虹驚波蕩滴石關怒
石門空洞如弛弓風霜剝蝕勢欲壓亂石齒齒填深洪
南連淮楚九地厚東導齊魯群流通征商貿遷百貨阜
來帆去櫂紛奔衝車輪彭鎬鐸聲急馬蹏蹏踏塵影紅
我遊天京偶經此一見淳俗真堯封扁舟膠涸守連日
欲去未去心中忡忡嗟予行役浪自苦颯颯吟鬢將秋蓬
摩挲殘碣討遺迹搔首踣躅斜陽中銜杯一洗胸芥蒂

浩歌目送吳天鴻

濟南原上

朔河春透冰未裂黃蘆伐盡洲渚闊荒祠老棟壓欲頽
古樹無枝枯復活長嘶飛騎抹流雲草舍微茫聚疎樾
夕陽返景低黃埃漠漠平沙浩如雪

冠州

臨津衝要環墟市橫橋斷岸人如蟻車聲軋軋風蓬蓬
道上黃塵半空起御河柳色如藍綠翻翻酒旆風高矗

歸馬聲喧煙火深落日孤城催暮角

蒲萄酒

翠虬夭矯飛不去領下明珠脫寒露累累千斛晝夜春
列甕滿浸秋泉紅數宵醞月清光轉穠腴芳髓蒸霞暖
酒成快瀉宮壺香春風吹凍玻璃光甘逾瑞露濃欺乳
麴生風味難通譜縱教典却鸛鷖裘不將一斗博涼州
次韻馮仲遠聽鄰舟孟監州琵琶

江州司馬真愁絕潯陽夜醉黃蘆月琵琶撥動兒女情

淚濕青衫寫淒切漢東傑客老監州雲夢胸中吐奇崛
春風斗酒忽解后暮雨扁舟談激烈酒酣古調手自傳
鷗絃撼動龍香撥抑揚按節氣雄放清度回飈激林樾
迢迢訴盡出關情漢宮往事孤鴻滅黃雲萬里絕音塵
馬上誰能記嗚咽新聲洗盡鬱輪袍清和扣舷歌間發
曲終一笑兩茫然江水泠泠滿襟雪

客枕

寒更四點雞未號行人道上聲嘈嘈酸風慘慄寒鼻鼾

長河爭渡冰堅牢霜花著面膚欲裂虬髯稜稜凍欲折
征車卷地聲如雷索駝吼落燕山月

冷泉亭

昔人來自天竺國縹緲孤雲伴飛錫天風吹落凝不去
化作奇峰聳空碧至今裂峽餘雲髓桂冷松香流未已
翠光圍住玉壺秋不放晴雷度山趾道人晏坐無生滅
炯炯層胸照冰雪夜深出定汲清泠寒猿啼斷西巖月

次春日即事韻

吳蠶欲老疇未秧拍堤野水迴橫塘淡煙疎樹綠陰薄
落花飛絮白日長寒具油乾過冷節怱怱芳事歸鶗鴂
枕書睡足午窓明雪乳浮浮翻兔褐

雅勒呼

送御史王伯循之南臺

京華歲晏饒風雪况復知交遠相別金貂貫酒燕市傍
官柳殘條不堪折客心戀戀不忍發離歌莫唱陽關疊
羨君年少早致身文章德業追古人繡衣驄馬向南去

江湖草木含青春

劉聞

送傳與礪交州教授

君不見丹穴產鳳雛五色不是凡禽狀
廣文年少薄遊吳一旦詩名動天上
前年開詔赴交州今年載書東海頭
仙人騎羊渺何許歸夢先落江南洲
樹枝當窓靈鵲喜綵服趨拜庭闈裏
別有佳期隔片雲洞庭月照瀟湘水
君歌有所思我歌遠別離落花飛絮
春去盡杯酒相

送都門時一官冷熱何足取文章自可名不朽滄波早
掣釣鰲鉤莫遣玉堂人倚久

柯九思

題所藏趙仲穆畫江山秋霽圖

國朝名畫誰第一只數吳興趙翰林高標雅韻化幽壤
斷縑遺楮輕黃金憶昔金華陪勝集郎君妙年才二十
江南春雨又相逢筆底秋山那可及便欲追蹤僧巨然
破墨爛漫還清妍倚闌人待滄海月懸崖樹拂瀟湘煙

老夫絕愛扁舟趣風靜波深疑可渡顧生癡絕忽大叫
指點前峰問歸路

送趙季文之湖州參軍與達兼善秘書同賦

人生功名如掣電獨有君家吾所羨弟兄玉立總成名
堂上慈親尚強健伯兄日日報平安喜溢萱花促張宴
參軍趙官百餘里甘旨懸知可充膳聞君二月當揚舠
太湖水暖春冥冥碧瀾堂前萬花麗水精宮外羣峰青
幕府事稀多暇日騎馬題詩訪陳迹野亭日落朱顏酡

早寄書來慰思憶

題宋誠夫尚書垂綸亭

尚書昔隱江漢間垂綸蒼波弄白日千山桃葉起春謳
萬頃蘆花湧秋色適興偶拂珊瑚光豈謂渭濱終得璜
未央奏策動天子四海籍籍傳文章至今亭子松陰古
磯上蒼苔長膏雨經綸事竟尋舊遊願逐茶煙渡湘浦

題錢舜舉畫梨花

洛陽城西千樹雪走馬看花徧阡陌金鞭換酒為沈飲

爛醉花前扶不得粉香熏透詩人脾思入吳牋灑殘墨
別來風雨難為春客懷幾度孤清明壯遊回首已陳迹
一聲啼鳥心魂驚苔溪居士獲天趣造化潛移不知處
玉容寂寞涉春寒猶記香山舊時句羨君好古情有餘
勵志恥作黃金奴梅邊握手恨不早老眼半世空江湖
畫圖詩筆耀當代大嚼屠門意殊快更須什襲為珍藏
靜裏春光常自在

中秋醉後偶作

虞淵日沈群動息露點蒼苔鬼工泣纖塵不染堪輿情
秋水無痕湛晴碧初若照膽鏡飛上天一壁又如驪龍
珠跳出滄海窟冷光透體骨髓凝灝氣侵人毛髮立年
年中秋事行李孤館殘燈滯他邑今歲居貧家此景頗
自適持杯向月月墮酒舉酒長吞月隨入酒到胸中飛
火車月入詩腸灑冰汁眼花忽見仙人來笑語欣然若
相識長笛叫虛寒餘響裂巖石搔首於兩間今夕復何
夕雲中老桂飄古香樹影婆娑印蟾壁天風忽吹散人

月兩俱失玉山倒入無何鄉雄雞一聲東方白

李裕

次祭酒虞伯生先生壁間韻

八月一日灤河濱西風白草長如人城烏未棲角未起
落日砧杵連比鄰砧聲砧聲一何急露寒孀婦抱衣泣
行人獨向明月中望斷星河夜深立

贈人歸江西

春深瓊島輕陰碧翠殿瑤階甃文石貂蟬侍中曉傳詔

殿頭急宣供奉入玉音春暖珠琅琅金篦屈折盤龍香
十年珥筆向左掖錦衣白日歸故鄉故鄉歸去隔江水
江上蘼蕪一千里短楫紅船載燕女少婦深閨怨遊子
江頭風急楊花飛鷓鴣暮雨煙中啼

胡寬

送友之官江西

花間乳鶯啼曙色送客驅車上南陌陌頭芳草綠萋萋
今人古人滅行迹明發吳儂燕尾船江卷寒潮飛練白

鸞童乘月吹紫笙不似琵琶怨秋瑟滕王閣中歌舞闌
一望雲林謝公宅

韓性

韓左軍馬圖卷

五花雲散紫電光
縶維未許飛龍驤
垂頭欲就圉人飲
渴鳥作勢吞銀潢
長安畫史擅筆力
萬里猛氣收毫芒
羽人乘風倦鞍勒
一笑收拾藏巾箱
世人不識真驕驕
顧影尚爾分驪黃
放鶴峰前有遺意
神駿政可誇支郎

宛委山

秦山幾千仞翠入蓬萊城城中望山色明暗分陰晴老
夫散策山前路為愛看雲不歸去仰看驚怪鷺飛來回
頭忽見雲生處崦中孤起如炊煙乘風騰上蒼厓巔厓
巔宿雲喜迎接橫空一幅兒羅縣天風吹散銀千縷淡
處是煙濃是雨雲師拗怒不肯回露出峰頭尺來許一
雨三日溪水肥老夫欲歸不成歸雲師知我慘不樂故
出小謫相娛嬉老夫作詩一笑領舉袖收雲散空迴倚

松絕叫山下人仰看雲峰起山頂

東山

遠山倚空青濛濛剡溪白西來天東天機不卷芳草碧
中有行地雙蟠龍扶藜欲出人間世俯仰明河在平地
長松忽動鶴飛來萬里剛風起衣袂薔薇開落春復秋
洗屐何人繼清遊凭闌一笑衆山小遙指雲氣看齊州

陽明洞二首

洞天深窅行客疑飈輪碧簡誰能稽倚松長嘯巖壑動

放懷未必今人非石氣盤空散成霧
檜子無風落青雨
草間欲問苗龍壇
薜荔鱗鱗絡銅虎

蕙草雪消蜂蝶疑遊子挈榼來何稽
少待山桃綴紅糝
回首已憐春事非青風成雲濕成霧
洞天深沈百花雨
山深玉殿鎖碧苔
天上通明羅九虎

陳深

書駿馬圖

王良伯樂骨已朽曹霸丹青亦希有
開圖歛見神駿姿

對酒高歌雄劍吼
祇今騏驥困鹽車
落日長鳴漫昂首
嗤嗤俗眼迷天機
相士嫌貧馬嫌瘦

程益

賦得金盤露酒送宋顯夫僉事之山南

鳳城仙客來揚州
便當解此千金裘
丹丘夜出瑪瑙甕
洞庭春汎瑤華舟
看花路入竹西寺
吹簫人倚橋邊樓
船頭對月且獨飲
錦袍明日金陵遊

俞希魯

題李伯時三馬圖卷

渥洼汗血真龍種千里霜蹄賈餘勇
闔闔牽來三疋練霧鬣霜髯欲飛動
龍眠居士筆有神獨憐神駿為寫真
雪堂老翁親灑翰妙墨著楮光如新
三百年間一蕭瑟此書此畫俱難得
市骨猶拚五百金此卷應當黃金直
方今四海同一家玉闕咫尺無塵沙
十二閑中盡馭馭不須更畫青絲結

辛鈞

些洲煙雨

漁翁披蓑侵暮歸
家家買魚趁晚炊
沙村草樹遠復近
一簇兩簇青冥迷
蘆花深處歌竹枝
人間風浪那得知
明朝雨過杜若長
定有采藥仙人來

桂嶺晴嵐

青山山氣薄
日色似霧非霧
雲非雲我疑玉煙吹不斷
化作老桂香氤氲
仙人振衣千仞岡
對花酌酒傳瓊觴
一觴一詠聲鏗鏘
吐出字字天葩香

劉詵

題白府判仲謙所藏錢舜舉巖壑圖

我如謝公好名山開卷著我千巖萬壑間
亂煙遙峰出縹緲怪石翠樹相回環
忽然山破飛瀑落皎如仙人玉帶垂
雲端喧飀欲撼溪谷動使我毛髮森清寒
不知其間有何徑但見荷擔兩兩相追攀
浮屠崔嵬蒼壁頂佛屋隱映長松闕
下通窈窕知何處想見小溪穿石去沙
邊汲叟犬相隨橋上行人驢半渡
林空路斷孤舟橫或

坐舟尾或疾撐左巖右灘地苦狹長篙落石如有聲我
疑桃源從此逝恍若風景非人世欲呼錢郎問其塗錢
郎已去誰能呼

謝王宜遠餉黃雀

野田秋陰稻穗垂山禽來啄日以肥斑斑背點楚雁色
煌煌腹借倉庚衣稍飢作陣帶雨下既飽聯翅穿雲飛
土人攜網巧覘伺或布一網無脫遺高明購買貴初出
但取悅口寧論貲饌美鮮淨凝琥珀入酒漱豔明琉璃

詩人尤喜體質滑錫以美號柔絲披嗟哉羣百性命易
一旦鼎鑊魚貫隨物惟有美足取害復以貪得忘罟維
頭顱萬里奉包篚幸免遠貢遭明時吾徒縱食誠有媿
捫腹何以酬相知

題羅稚川小景

遠洲連岡近洲平高樹稀葉低樹青長溪浸日流無聲
中有數葉漁舟橫誰家飛軒接水亭沙邊客至扶杖迎
江村頗類浣花里人品兼似陶淵明

題鐵仲堅宣差所藏羅稚川煙村圖

荒邨漠漠煙連山，誰家野店兩樹間。
青帘稍出樹梢外，秋風敗葉寒斑斑。
路通白石流水亂，長橋縹緲依山澗。
漁姑得酒歸意速，攜稚渡橋如落雁。
寒藤老木又一川，冒船方饌冒斜懸。
有魚有酒復有客，風致何必能詩篇。
亂鴉幾點天疑暮，欲泊未泊環高樹。
小舟七八散前灘，或倚長篙收釣具。
君不見鷗夷一舸遊五湖，子陵羊裘釣桐廬。
安知若人非其徒。

廬陵十景同蕭克有字有諸公作

錄四首

神岡晚橋

兩江秋波燕尾岐千嶂春木鳳翅齊道人結船布江面
行者如蟻東復西巒頭煙起樵子急林杪磬發山僧歸
菴中老僧危坐穩付與萬古看斜暉

螺峰殘雪

城東青山女兒眉天寒變作滄浪髭晴風忽放寸碧出
亂白猶在蒼松枝瞰光日射分衆色斷續碎錦春離離

道人看山踏泥去日暮拾得金螺歸

古城秋釀

大江蓼花紅滿堤上人家多竹籬雨廚爭炊白雪甌
霜甕滿瀉黃酥卮城中少年好游冶渡江買醉攜蛾眉
江東估客貪祭賽第一先酹蕭郎祠

小洲暮漁

螺湖石屋江水平大船小船滿東津舉罾出魚輒數十
落日光射金鱗鱗楓橋煙起新酒熟共穿小魚飲西鄰

大魚雖肥且勿食明朝賣與城中人

賦杜氏秋晚紅梅用友人韻

君不見綠珠吹笛意態閒畫樓百尺垂闌干紅妝千年
不復識今日忽見春風邨又不見景陽麗華唱壁月醢
腮半露鈿花繁酒酣妙舞未肯散一笑婉婉宮井寒餘
妍尚可眩一世緣空化盡難為完坐令前身白玉質施
朱作豔嬌能言頗疑守宮點臂痕不滅又疑如意傷頰
血未乾淒風澹月疎竹外幽香著客能返魂同根霜雪

魁百卉未有早秀爭秋蘭煌煌庭院生曉色一樹變作
扶桑瞰我欲呼坡仙叩門共醉詩清溫我欲喚東野長
安一日走馬看向來酒禁今已釋莫遣頃刻無壘尊

賦歐園海棠和羅起初

蜀州海棠錦成畦昌州海棠芳氣菲名花自古恨不見
東風吹在西家西美人壓酒紅珠落半笑新晴半含萼
玉膚柔薄絳袖寒妝淚輕盈脂臉忤太真姣睡金屋春
綠珠夜燕宮蠟薪一時群花盡妾媵娉娉嫋嫋真仙人

雨餘繁枝深綠淨好及佳時入觴詠花容相對易新故
人事無情有衰盛我昔曾同花下歡寶釵插映鴉髮盤
只今便能日日為花醉欲挽朱顏應已難

南樓乘月

人間塵埃能幾何夜夜明月九州白獨提愁髮御秋風
漢江染之不成黑江流迎我來滔滔古今銷盡黃龍高
樓頭攜酒邀天飲我與殷庾為三豪吳姬膚肉映肪雪
笑倩坐客穿舞袍胡牀吹玉龍朱闌懸豪曹已傾四海

添我酒更推三山鱸其鰲苻堅石勒豎子耳尺組縻之
如猿獠昔人功名何足論惟有風流千載存當時結束
不成興誰愛明月來端門我起舞君莫回姮娥隨人不
可推君捉我影入我手酌君玻璃三萬杯

和劉元翁

廬山江水之西流今年涉我舟復舟平生歲月向此盡
百里何必非并幽伏波少游兩不可元髮如客誰能留
南飛鳬鷗北鴻雁我亦天地無幾求空山歲晏催客別

與子擊筑歌四愁陌頭雞鳴曙光發池上古木寒蕭颼
人生百年各有願養牛種橘亦得齊封侯

雪林獵虎

丙辰歲晏無營友人有賦
十題者援筆戲效其體

朔風曉寒天地白將軍打圍千騎列南山老獸工避人
穿厓蔽木蹤不滅地窮怒躍戟亂衝千丈瑤峰盡成血
却懸駝背歸入城不見欄徧見白額

竹外梅梢

誰家修篁千萬竿短牆流水朱闌干孤芳託根得春早

一枝斜出行路看遙凝青林炯初霽一點兩點雪未殘
小窓月落霜角動誰與伴此空山寒

水邊柳影

江南殘臘冰雪消人家垂楊如灞橋窺春嬌眼寒未動
彷彿已學東風腰東家女兒重歲月心逐時物先妖嬈
此時欲寄未可折直待二月黃金條

城角春聲

江城窮年柳芽黃家家辛盤鬪稱觴城樓夜吹梅花引

起視天宇皆飛霜牛衣有人久待旦冷銼三尺冰花長
勿云暖律苦未轉中有萬斛東風香

江帆雪影

朔風殷空夜飛霞百萬玉龍交曉戰茫茫天地如大荒
只有行波蒲一片推篷四望眼光眩倒浸玉扉水中見
却疑馮夷宴未終舞女猶持白鸞扇

和羅昌逢蠟梅

梅兄不見今幾時黃塵盡浣冰玉姿却疑來從金仙國

已覺顏貌俱近之水邊林下恍如昨都非都似驚相嬉
額黃萬斛塗未了頰怒半落宮簷枝縹裾下壓紺裾裼
紺袖醉枕紅膚脂天寒鶯兒凍凝酒日明蜂戶光分脾
暗香著人欲襲骨妙意未必和靖知小窓靜晝膽鏘古
長廊微雪朱簾垂一枝几案誰所置便覺春意生睫睂
勿嫌吟詩苦不似酒觴更倒黃金卮

和羅昌逢

空江五月輕帆漲南風飄飄卷衣浪故人百里肯重尋

相逢喜見平生心窮通慣見貌難老談笑生風人愈好
新詩猶欲俎豆予倦遊久已如相如夢中占夢竟何據
鄉人說鄉念歸去春花繞屋菰韭長有酒不願求西涼
宋无

西湖酒家壁畫枯木

衡岳喬松道途遠成都古柏山川隔忽驚老樹刺眼來
疑是頽崖壓東壁拗怒風雷龍虎氣盤摺造化乾坤力
陰連滄海一片秋秀奪西湖兩峰色寒雲苒惹靈畫影

凍蘚緣沿借春碧醉翁睥睨欲挂衣禪伯經營思憩錫
烏鳶冥下踏枝空猿猱夜過噉藤仄鐵榦銅柯嗅不香
蒼雪元煙潤將滴便擬攀蘿解糾纏何煩平地生荆棘
直須埽去曲磔姿揮作昂霄數千尺

梁隆吉遺馮筆并詩荅以長句

吳剛夜入廣寒闕生擒老兔出秋月嫦娥泣雨蟾影孤
靈藥不舂玉杵歇桂花凝毫拔蒼綠蜀絲纏金縷湘竹
紫蘭蕊笑春風愁蓮花仙冠墜簪玉松腴點漆光照眸

藤肪搗雪滑欲流樂毅小帖排銀鉤天馬歷塊無九州
夢中忘筆那有花古錐畫地飛龍蛇覺來尋錐亦無處
但見鳥跡留平沙

南岳李道士畫雙松圖

道士醉卧天柱峰睥睨石上千年之老松松精相感入
夢寐化作蒼髯雙老龍酒腸空洞生鱗角飛出兩龍醉
不覺須臾霹靂撼五岳豐隆縮手不敢捉神靈頃刻歸
虛無壁上但見雙松圖松邪龍邪莫能詰棟梁霖雨藏

秃筆

僧日觀畫蒲萄


玉山道人蒼壁立胸瀦萬斛松煤汁吐作千年古怪藤
猶帶西湖煙雨濕元氣淋漓草木活太陰菌蠢蟲蛇蟄
須縈翠霧瘦蛟走晴抉元珠黑龍泣神剜鬼刻字崛奇
水精火齊光陸離天魔擎來空青寶蛟波涌出珊瑚枝
墨花酣春馬乳漲醉夢渴想西涼姿風窓秋疑蟲葉語
露架夜憶虬柯垂須臾掩卷何所見月落庭空無影時

汪珍

孫逸夫書堂作

青山盤盤雲氣度
岡巒滅沒互吞吐
柘林煙潤繭行絲
荷蕩水香魚吐絮
人間化物日月流
先生閉門雙鬢秋
大隱從來在朝市
幽居况近城南樓

御選元詩卷二十九



總校官庶吉士臣侍朝

校對官檢討臣蕭九成

謄錄監生臣朱文佐